

**Erich Bolinius**

[www.erichbolinius.de](http://www.erichbolinius.de)

[Erich.Bolinus@t-online.de](mailto:Erich.Bolinus@t-online.de)

## **Bericht über den BSV Kickers Emden - Sendung „Flutlicht“ auf Radio Ostfriesland**

**Donnerstag, 12.7.2012 18.05 Uhr** auf 94.0 bzw. 87,7

Leev Toehörers,

dat Test- of Fründskuppsspöl van Kickers Emden tegen de FC Groningen lesd Saterdag in de Oostfreeslandstadion in Emden hett mi an Dartligatieden van Kickers erinnert. Dat fung al dormit an, dat sük smörgens in d` Stadt heel völ Skandarms uphollen denen. De meenten wall, dat van de hollandske Fans Gefahr utgahn kunn. Man dat was neet so, so as ik hört un ok sülvst sehn hebb.

As ik dann so tegen halv seß mit mien Auto up de Parkplatz vör de THW-Huus bi d` Oostfreeslandstadion kwamm, muss ik doch wahrhaftig na ´n Stee söken, wor ik noch parken kunn. Dat de Platz so full was, lagg ok doran, dat heel völ Hollanders mit hör Auto komen wassen.

An de Kasse stunn wall ´n Schlang, man dat gung heel gau - un ik harr ´n Sittplatzkaart vör 8 Euro in de Hannen. Over de Intreepries kann man neet meckern, spölt doch de Gegner in de hoogste Liga in Holland – Vergliek mit de Bundesliga bi uns.

In de Gastblock, achter de Tor up de Südsied, moken so ruugweg 400 hollandske Fans al luudstark bemerkbar. Vör de Tribüne spölte de hollandske „PAX-Jazzband-Kapell“ un broch de Fans in Stimmung. Blot so nebenbi: De Kapell hett de Honorarkonsul **Johannes Riepma** besörgt, de ok anners sük noch düchtig, toesamen mit Albert Peters van Kickers Emden, för dit Spöl inbrocht hett.

Dat mook so recht Vörfreid up dat Spöl. As de beid Mannskuppen uplepen, brannden de dütske un in de hollandske Fans Fürwark of. Junge, wat stunk dat noch bi uns up Tribüne. Man dat dürs neet lang, do vertruck sük de stinkende Nebel. Ik fraag mi aber, wat de Ofbrannereei sall. Dat deit neet nödig, meen ik.

Bevör dann ennelk dat Spöl anfangen kunn, wurr Schiri **Peter Bartsch** noch van de Emder Schiribaas **Bernd Garen** ehrt, wall dat sien lesd Spöl as Schiri was. He hett för Emden heel hoog in de Foetballligen fleit.

De Groningers leggten glik as de Fürwehr löß un drängten Kickers na achtern. Dat dat so komen kunn, wuss natürelk ok Kickerstrainer **Yasin Turan** in vörut un harr sien Mannskupp dorna instellt. Un de Achtermannskupp van Kickers Emden stunn goed, as ´n Boom – so seggen wi Oostfreesen dat ja.

Man kunn sehn, dat **Bernd Grotelüschen** un **Manuel Menzel** ok al in dart Liga spölt hebben, se wassen de Toorns in de Ofweherschlacht. Man ok Kickers kwamm of un toe na vörn. So spölte sük **Thilko Boekhoff** glik toe Anfang wunnerbaar dör. Dat harr dat 1:0 för Kickers Emden wesen kunnt. Boekhoff mook för mi ´n heel goed Spöl.

Man dann kwamm de 9. Menüte. ´n lang Ball up Kickersspöler **Carlos Santos da Luz**, de rennt mit de Ball an Foet in Richt Tor. Tegen hum löppt heel freei noch ´n Kickersspöler. Worum spölt he neet of, segg ik noch an de Emder Baas van de Stadtsportbund **Hans-Werner Wehmhörner**, de tegen mi satt, man dann trau ik mien Ogen – un seker all Toekiekers in ´t Stadion – neet. De Kickersspöler sücht wall, dat de Torwart ´n bietje wiet vör sien Tor steiht un knallt de Ball ut goed 35 of 40 Meter over hum in ´t Tor. „Tor des Monats“

röpen de Fans tegen mi up de Tribüne. Dat mutt in de Kiekkast, meenen eenige van de Toekierkers.

Un wat was dat vör 'n Freid. De jung Kickersmannskupp gung mit 1:0 tegen 'n Eerstligamannskupp in Föhren! All Spölers, Ersatzspölers, Trainer un Betreuer van Kickers Emden sprungen up un lepen in Richt van de portugiesische Kickerspöler Carlos Santos da Luz um hum toe drücken un toe graleren.

Dat 1:1 full dann al in de 14. Menüte. Na 'n Flank stunn de Kaptein van Groningen bold alleen an de linke Torposten un kunn de Ball weer na binnen köppen. Emdens Torwart kwamm wall noch an de Ball, kunn hum aber neet fasthollen - was na mien Menen Torwartfehler – so dat de Spöler **David Texeira** inköppen kunn.

In de 22. Menüte dann dat 1:2 as 'n de flinke Groninger Butenspöler de Ball skarp un flach in de Straafruum skoot un de Spöler **Paco van Moorsel** feller an de Ball kwamm as sien Tegenspöler.

Kört vör de Halvtiedpaus kunn dann noch Emder Spöler up de Torstreek 'n skarp skoten Spöler de Ball ruthauen.

De Bült Wesseleei up beid Sieden mook dat Spöl neet beter, vör allen up de Groninger Sied.

Dat dürt bit toe de 82. Menüte, as na 'n Freetrapp **Tim Keurntjes** dat 3:1 skoot. Skaa, dat in de 88. Menüte **Michael de Leeuw** noch dat 4:1 skoot. Dat Manuell Menzel noch de geel-rood Kaart kört vör Enn kreg, was neet moi. Ik meen, wenn al, dat de Schiri dann ok de Groninger van d' Platz harr stellen muss. Aber wat sall't.

De Emder Toekiekers wassen sük eenig: Dat was al 'n heel goed Spöl van hör Mannskupp. Un de Emder Mannskupp kann stolt wesen, sük so tegen 'n Eerstligamannskupp ut Holland slaan toe hebben.

Ik bün seker, Kickers Emden deit ok in de komende Saison in de Landesliga 'n goed Rull spölen.

Freien wi uns dorup.

So, dat was dat weer maal för disse Week,  
ik hoop, Joe hett dat Plattdütsk gefallen, denn mien Motto heet ja alltied,  
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.